

## **Naija - Fridom God Wod - Deliverance Scriptures**

**Matu 6:13 'Nor alow us enta temtashon bot mak yu save us from bad tins.'**

**Matu 8:16 Wen evenin rish, dem bring meni pipol wey dimon dey insaid dem kom mit Jisos. E driv di wiked spirits komot kon heal all di pipol wey nor wel.**

**Matu 10:1 Jisos kol en twef disaipols kon giv dem pawa to driv dimons and heal all diziz and siknes.**

**Matu 10:8 "Mak una heal pipol wey nor wel, wak pipol wey don die, kior lepas and driv dimons komot from pipol bodi. Na fri God giv una dis pawa, so mak una gi-am fri to oda pipol tu.**

**Matu 12:26-29 "So if Satan dey driv Satan komot, e don divide ensef bi dat.**

**Haw en kindom go fit stand? 27 "And if na Belzibub pawa I dey tak driv dimons komot, na wish pawa una shildren dey tak driv dimon tu? Bikos of dis, una shidren go joj una. 28 "Bot if na God Spirit I tak dey driv dimons, naim bi sey God Kindom don alredi kom mit una. 29 "Haw pesin go fit break enta strong man haus kon tif en propati, unles e first tie di strong man? Den e go get shanse tif wetin dey di haus. (Mark 3:23-27)**

**Matu 12:43-45 "Wen evil spirit don komot from pesin bodi, e dey pas wer wota nor dey, dey faind wer e go res, bot if e nor si, 44 e go tel ensef, 'I go-go bak to di haus wer I from komot.' Wen e go bak kon si sey di haus empti and dem don swip and arange am, 45 e go-go bring sevun spirit wey wiked pas am, kom. Dem go enta di pesin kon sidan for der, so di pesin kondishon go kon bad pas as e bi bifor. Na laik dis e go hapun to evil pipol for dis taim."**

**Matu 15:22,26,28 For der, won Kanan wuman krai kom mit am sey, "Oga, David Pikin, mak yu sori for mi! My dota nor wel, bikos dimon dey trobol am!" 26 Jisos kon tel am, "E nor gud to giv dog di bread wey shildren sopoz to chop." 28 So Jisos tel am, "Madam, yor fate big wel-wel! Mak wetin yu dey faind rish yor hand." Dat same taim, di pikin kon wel.**

**Matu 16:19 "I go giv yu hevun key, so dat enitin wey yor praya tie for eart, dem go tie am for hevun and enitin wey yor praya luz for dis eart, dem go luz am for hevun." (Matu 18:18)**

**Matu 17:19-21 Jisos kon ansa, "Una wey nor get fate and wey nor no wetin to du! Haw long I go dey wit una? Haw long I go bear wit una? Mak una bring di boy kom here." 18 Den Jisos komand di dimon komot from di boy bodi and at wons, di boy kon wel. 19 Wen onli di disaipols dey wit Jisos, dem kon ask am, "Why wi nor fit driv di dimon komot from di boy bodi?" 20 Jisos ansa dem, "Na bikos una fate tu smol and I tel una tru wod, 'If una get fate wey smol laik mustard sid, una go tel dis mountin, "Mak yu move from here go yonda" and e go move and nortin go hard una to du. 21 "Dis kaind dimon**

**nor go gri komot from pesin bodi esept wit fastin and praya."**

**Mark 1:23-26 For insaid di sinagog, won man wey evil spirit dey insaid en bodi kon shaut dey sey, 24 "Mak yu liv us o-o, Jisos wey kom from Nazaret! Abi, yu don kom distroi us? I no hu yu bi. Yu bi God Pikin wey dey holi." 25 Bot Jisos komand am, "Shut up and kom out from di man!" 26 Afta di evil spirit don shake di man wel-wel, e shaut kon kom out from di man bodi.**

**Mark 1:32-34 Wen sun don dey go dan for evenin, dem kon bring all di pipol wey nor wel and wey get dimon kom mit Jisos. 33 Di hol tawn kon gada for di domot. 34 So, Jisos heal meni pipol wey nor wel wit difren-difren diziz and e driv meni dimon komot from pipol bodi. Bot e nor let di dimons tok, bikos dem no hu e bi.**

**Mark 1:39 So e kon go evriwer for Galili dey prish for dia sinagog and dey driv dimon komot from pipol bodi.**

**Mark 3:14,15 Jisos klimb go on-top mountin kon kol di pipol wey e wont, mak dem kom mit am for der. 14 E kon shuz twef (wey e kol apostols), so dat dem go dey wit am and e go fit send dem go prish.**

**Mark 5:8 (Bikos Jisos don tel di dimon bifor sey, "Komot from dat man bodi!")**

**Mark 6:7,13 Jisos kol di twef disaipols kon send dem tu-tu go out. E giv dem pawa to driv evil spirits komot from pipol bodi. 13 Dem driv meni dimon komot from pipol bodi and pour oil for meni pipol wey nor wel head kon heal dem.**

**Mark 9:23-25 Den Jisos ask am, "Yu min, 'If I fit?' Evritin dey posibol for di pesin wey biliv." 24 Kwik-kwik di boy papa kon shaut, "I biliv o-o! Help mi mak I biliv more-more!" 25 Wen Jisos si sey pipol dey gada, e kon tel di evil spirit, "Yu deaf and dumb spirit, I komand mak yu kom out from di boy and nor enta en bodi again."**

**Mark 9:29 Jisos ansa dem, "Na onli wit praya and fastin dis kaind won dey tak komot."**

**Mark 9:38,39 Jon kon tel am, "Tisha, wi si won man wey yuz yor name dey driv dimon komot from insaid pipol bodi and wi kon trai to stop am, bikos e nor dey folo us waka." 39 Bot Jisos ansa dem, "Mak una nor stop am, bikos nobodi wey yuz my name du mirakol go fit tok bad tin abaut mi.**

**Mark 16:17 "Dis signs go folo pipol wey biliv: Wit my name, dem go driv dimon komot from pipol bodi; dem go speak new language wey dem nor learn;**

**Luk 4:18 "God Spirit dey my bodi, bikos E don anoint mi mak I prish Gud News giv poor pipol. E send mi mak I prish fridom giv pipol wey dey prizin and mak blind pipol for si. E stil sey mak I fri doz wey dem dey opres (Isaia 61:1)**

**Luk 4:34-36 "Abeg, mak yu liv us alone, Jisos wey kom from Nazaret! Yu don kom distroi us? I no hu yu bi, yu bi God savant wey holi." 35 Bot Jisos tel am: "Mak yu shut up! Yu dimon, komot for en bodi." Di dimon trow di man for groun for dia front kon komot for en bodi, bot di man nor wound. 36 Di**

**pipol sopraiz kon dey ask ish oda, "Wetin dey hapun so? Dis man dey yuz God pawa tak komand dimon and dem dey obey am!"**

**Luk 4:41 Dimons dey shaut dey komot from meni pipol bodi, dey sey, "Yu bi God Pikan!" Bot Jisos warn dem mak dem nor tok, bikos dem no sey, naim bi di Mezaya.**

**Luk 7:21 For dat same taim, Jisos heal meni pipol wey get difren siknes, pipol wey get evil spirit and pipol wey nor fit si, kon dey si.**

**Luk 8:29 E shaut, bikos Jisos don first komand di evil spirit mak e komot for en bodi (bikos di evil spirit don disturb di man wel-wel and dem dey chain and gaid am. Bot e dey break di chain and di dimon go driv am go insaid desert.)**

**Luk 9:40 "I beg yor disaipols mak dem driv di dimon komot, bot dem nor fit."**

**Luk 10:17-20 Di sevunti-tu men kon kom bak wit hapines, dey sey, "Oga, ivun dimons dey obey us wen wi komand dem wit yor name!" 18 Jisos tel dem, "I si Satan wen e fal laik tunda-lite from hevun. 19 "Mak una listin, I don giv una pawa to waka on-top snake and skorpion and to ova kom all di enim pawa, so nor-tin go fit wound una. 20 "Mak una nor onli dey hapi sey evil spirit dey obey una, insted mak una hapi sey God rite una name for hevun."**

**Luk 11:4 Mak Yu forgiv us awa sins, as wi dey forgiv doz wey du us bad. Nor let us enta temptashon."**

**Luk 11:14 Won day, Jisos kon driv dimon wey dey mak pesin nor fit tok komot for won man bodi. Wen di dimon don komot, di man bigin tok and di pipol sopraiz wel-wel.**

**Luk 11:20-22 "Bot if na God pawa I tak dey driv dimon komot, naim bi sey God Kindom don rish wer una dey. 21 "Wen pesin wey get pawa redi wel-wel gaid en own haus, all en tins go dey safe. 22 "Bot wen pesin wey get pawa pas am atak and win am, di pesin go kari all di tins wey di man tak dey protet ensef kon divide di propati wey rimain.**

**Luk 13:32 Bot Jisos tel dem, "Mak una go mit dat yeye man tel am, 'Si, for today, tomoro and next tomoro, I go stil dey driv dimons dey heal pipol, ontil my wok go finish.**

**Jon 14:12 "I tel una tru wod, di pesin wey biliv mi, go du di kaind mirakol wey I dey du and e go ivun du di wons wey big pas dem, bikos I dey go mit my Papa.**

**Jon 17:15 "I nor sey mak Yu rimov dem from di wold, bot mak Yu protet dem from di devol.**

**Apostols 10:38 Jisos Kraist wey kom from Nazaret, na-im God giv di Holi Spirit and pawa. Haw e kon du gud for evriwer kon heal pipol wey devol dey opres, bikos God dey wit am.**

**Apostols 16:17,18 Di girl kon dey folo mi and Pol for bak kon dey shaut sey, "Dis pipol na God savants -o-o, dem dey prish to una abaut haw una go tak dey save." 18 E kontinu to dey shaut laik dis for meni days. So di tin ves Pol**

**wel-wel, naim e turn face di girl kon tel di spirit, "I komand yu wit Jisos Kraist name, komot for dis girl bodi!" At wons, di spirit komot from di girl bodi.**

**Apostols 19:11,12 Dat taim, God yuz Pol dey du meni wondaful mirakols, 12 ivun handkachef and klot wey dem tak tosh Pol bodi, dey heal sik pipol and driv evil spirit from pipol bodi, wen dem yuz am tosh dem.**

**Apostols 26:15-18 "So I ask am, 'Oga! Hu yu bi?' Di Oga ansa, 'I bi Jisos Kraist wey yu dey ponish. 16 'Bot mak yu get up, bikos I don show myself to yu and don shuz yu as my savant and witnes to di tins wey yu don si and di wons wey I go show yu. 17 'I go save yu from yor own pipol and from Gentai pipol wey I dey send yu go mit, so dat 18 yu go opun dia eyes mak dem for waka komot from daknes enta lite. Mak dem komot from Satan hand, go mit God, so dat God go forgiv dem dia sins and dem go folo di pipol wey God don mak klin, bikos dem biliv am.'**

**Roman 16:20 And God wey dey giv peace, go soon distroi Satan for una. Mak awa Oga Jisos Kraist grace dey wit una.**

**2 Sekon Korintians 2:11 so dat Satan nor go disiv us, bikos wi no en wayo.**

**Galasha 1:4 Na Jisos die for awa sins, bikos na so God awa Papa wont am.**

**Efisos 4:27 Mak una nor giv di devol eni shanse.**

**Efisos 6:11 Mak una wear komplit soja uniform wey God dey giv, so dat una go fit stand fite di wayo wey devol dey yuz.**

**2 Sekon Tesalonika 3:2,3 Mak God diliva us from wiked and evil pipol, bikos nor bi evribodi get fate. 3 Bot Kraist dey kip en promis and E go mak una strong.**

**2 Sekon Timoti 2:26 Den dia sense go koret and dem nor go fal enta devol trap again. Bikos devol don kash dem put insaid en trap bifor and den dem dey du enitin wey e wont.**

**2 Sekon Timoti 4:18 And Kraist go stil save mi from evri evil plan ontill e tak mi enta en kindom. Mak glori bi en own foreva and eva. Amen!**

**1 Fest Pita 5:8 Mak una shine una eye wel-wel, bikos devol wey bi una enim, bi laik hungry lion wey dey shaut and dey faind hu e go chop.**

**1 Fest Jon 4:4 My shildren, una kom from God and una don get victori ova doz pipol, bikos di pesin wey dey insaid una, big pas di pesin wey dey di wold.**

**Numba 10:35 Let God arise and enemi skata.**

**Deuteronomy 23:5 God turn curse to blessing (Nehemia 13:2)**

**Psalm 44:4 God command fridom for Jacob.**